



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunal Distrital Suai
28 Agostu 2014

Tribunál Distritál Suai la funsiona durante semana ida depois fila hosi feriadu judisiál

Hahu husi loron 18, 21, 22 no 26-28 Agostu 2014, Tribunál Distritál Suai la hala'ó prosesu julgamentu tanba autór judisiáriu sira balun laiha fatin nomós laiha oráriu julgamentu.

Tuir observaun JSMP no klarifikasaun ne'ebé JSMP halo ho ofisial justisa iha Tribunál Distritál Suai hatudu katak iha 18 Agostu 2014 tribunál marka ona oráriu julgamentu leitura akordaun ba kazu ida maibe la konsege realiza tanba juis no ministériu públiku laiha fatin.

Iha 21 Agostu, tribunál marka ona oráriu julgamentu ba kazu kolektivu rua maibé la konsege realiza tanba membru juis kolektivu ba kazu ne'e la kompletu, nune'é tribunál adia fali nia prosesu. Aleinde ne'e, ministériu públiku mós laiha fatin mesmu arguidu no lezada sira ne'ebé tribunál notifika hot-hotu marka prezensa iha tribunál.

Tuir observasaun JSMP nian iha 19, 22, 25 26, 27 no 28 Agostu 2014 semana ida ne'e, tribunál laiha oráriu julgamentu fiksi. Signifika katak maizumenus durante semana ida nia laran, tribunál refere la iha atividade julgamentu.

“JSMP fiar katak majistradu juis no ministériu públiku sira sempre iha servisu adisionál seluk aleinde servisu prinsipal ne'ebé sira ezerse iha tribunál atu halo julgamentu no fo justisa. Mesmu nune'e, kuandu tribunál la funsiona durante semana ida nia laran tutuir malu, ne'e problema ida ne'ebé sériu no tenke hetan atensaun,” dehan Diretór Ezekutivu JSMP, Luis de Oliveira Sampaio.

JSMP hanoin katak tribunál tenke maneja atu kontinua funsiona durante loron servisu. Liu-liu tanba depois feriadu judisiáriu, tuir loloos majistradu sira hetan ona energia foun atu ezerse sira nia papel hodi hametin administrasaun justisa. Ne'e simplesmente atu aseguara katak ema sira ne'ebé to'o ona mai tribunál ho kapasidade nu'udar arguidu, vítima no testemuña ho sira nia limitasaun no difikulidade oi-oin, bele fila ho laran metin tanba tribunál tau interese ba sira nia kazu.

Iha fatin seluk, Tribunál Distritál Oe-Cusse, hatudu sira nia komitmentu forte teb-tebes atu kontinua hala'o prosesu julgamentu mesmu iha loron feriadu nasional. Ne'e manifesta sensibilidade institucional ne'ebé boot teb-tebes ba realidade sosial sosiedade no atu hametin konfiansa públiku iha seitór justisa formal.

JSMP kumpriende katak tribunál sira infrenta dezafiu oi-oin, maibe efetividade, konsistensia ho agenda julgamentu no produtivadade institutuisaun judisiáriu sira nian importante teb-tebes ba administrasaun justisa ida ne'ebe kredivel no konfiavel.

JSMP hein katak iha semana ida ne'e ba oin tribunál refere tenke hahu fali agenda julgamentu hanesan normal atu nune'é prinsípiu julgamentu simples, lalais no baratu no asesivel kontinua funsiona iha tribunál hotu-hotu.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl